

„ვამტკიცებ“

სსიპ „კულტურის, სპორტის და ახალგაზრდულ საქმეთა სააგენტოს“

დირექტორი: ლიანა კვარაცხელია

2024 წლის 27 თებერვლის 69/მ ბრძანების შესაბამისად

სსიპ კულტურის სპორტის და ახალგაზრდულ საქმეთა სააგენტო

ქვეპროგრამა „აფხაზეთის სახელით მოასპარეზე კლუბების/გუნდების ხელშეწყობა“

(ქვეპროგრამის კოდი: 06 27 03 08)

კომისიის მუშაობისა და ქვეპროგრამის განხორციელების წესი

მუხლი 1. ზოგადი დებულება

ა. ეს წესი განსაზღვრავს, სსიპ - „კულტურის, სპორტის და ახალგაზრდულ საქმეთა სააგენტოს“ (შემდგომში „სააგენტო“) დირექტორის 2024 წლის 29 იანვარის N40/მ ბრძანებით დამტკიცებული ქვეპროგრამა „აფხაზეთის სახელით მოასპარეზე კლუბების/გუნდების ხელშეწყობა“-ის (ქვეპროგრამის კოდი: 06 27 03 08) კომისიის მუშაობის წესსა და ქვეპროგრამის განხორციელების პროცედურებს.

ბ. ქვეპროგრამის განხორციელების მიზნით სააგენტო ქმნის კომისიას (შემდგომში „კომისია“).

გ. კომისიის მიერ მიღებული გადაწყვეტილება სავალდებულოა.

მუხლი 2. დაფინანსების მიმღები კლუბები/გუნდები

ა. დაფინანსების მიმღები სუბიექტი (შემდგომში ასევე მოხსენიებული როგორც „დაფინანსების მაძიებელი“) შეიძლება იყოს საქართველოს კანონმდებლობის შესაბამისად საქართველოს ტერიტორიაზე 2024 წლის 01 იანვრამდე რეგისტრირებული იურიდიული პირები (მხოლოდ სპორტული კლუბები/გუნდები), რომლებიც ასპარეზობენ აფხაზეთის (აფხაზეთთან დაკავშირებული) სახელით.

ბ. დაფინანსების მიმღების სუბიექტი არ შეიძლება იყოს ის გუნდი/კლუბი, რომელიც 2024 წლის განმავლობაში დაფინანსდა სააგენტოს სხვა ქვეპროგრამის ფარგლებში.

გ. ამ ქვეპროგრამის ფარგლებში დაფინანსების მიმღები სუბიექტი წლის განმავლობაში სარგებლობს მხოლოდ ამ ქვეპროგრამით.

მუხლი 3. დაფინანსების მიმღები სუბიექტის განსაზღვრა

ა. დაფინანსების მისაღებად, საქართველოს კანონმდებლობის შესაბამისად, საქართველოს ტერიტორიაზე რეგისტრირებულმა იურიდიულმა პირმა (მხოლოდ სპორტული კლუბები/გუნდები) წერილობითი განცხადებით უნდა მიმართოს სააგენტოს შემდეგ მისამართზე: საქართველო, თბილისი, დიმიტრი უზნაძის ქუჩა N68 (რეგისტრაციის ვადის გასვლის შემდეგ განაცხადებისა და დამატებითი დოკუმენტაციების მიღება დაუშვებელია).

ბ. განცხადებას უნდა ერთვოდეს სრულყოფილად შევსებული საპროექტო განაცხადი შემდეგ დოკუმენტაციებთან ერთად:

ბ.ა საბანკო რეკვიზიტები;

ბ.ბ განახლებული ამონაწერი მეწარმეთა და არასამეწარმეო იურიდიული პირების რეესტრიდან (ამონაწერი განახლებული უნდა იყოს განცხადების შემოტანიდან ბოლო ერთი კვირის განმავლობაში);

ბ.გ შესაბამისი ფედერაციების მიერ გაცემული ცნობა, რომელშიც მოცემული იქნება გუნდების შესახებ ინფორმაცია (მაგ: რომელი გუნდი, რომელ ლიგაში თამაშობს და ა.შ).

ბ.დ კომისია უფლებამოსილია, საჭიროების შემთხვევაში, ქვეპროგრამასთან დაკავშირებით განმცხადებელს მოსთხოვოს დამატებითი დოკუმენტაციის, ვიზუალური მასალისა და სხვა ინფორმაციის წარდგენა;

ბ.ე ზემოთ ჩამოთვლილი დოკუმენტაციის შესაბამისობას განცხადების კომისიისთვის წარდგენამდე ამოწმებს ქვეპროგრამის კოორდინატორი/კოორდინატორები.

გ. კომისია უფლებამოსილია, საჭიროების შემთხვევაში, ქვეპროგრამასთან დაკავშირებით განმცხადებელს მოსთხოვოს დამატებითი დოკუმენტაციის, ვიზუალური მასალისა და სხვა ინფორმაციის წარდგენა;

დ. საპროექტო განაცხადის ფორმას ამტკიცებს სააგენტოს დირექტორი.

ე. ამ ქვეპროგრამის განხორციელების მიზნით, სააგენტო უზრუნველყოფს კომისიისთვის 2024 წლის 01 იანვრამდე რეგისტრირებული, აფხაზეთის სახელით მოასპარეზე გუნდების/კლუბების შესახებ შემოსული განაცხადების წარდგენას (ფეხბურთი, კალათბურთი, რაგბი).

ვ. სააგენტო, ამ ქვეპროგრამის განხორციელების მიზნით, შექმნილი კომისიის მეშვეობით განიხილავს და განსაზღვრავს დაფინანსების მიმღებ სუბიექტებს.

ზ. ქვეპროგრამის ფარგლებში, ბენეფიციარებისთვის გასაცემი დაფინანსების ოდენობასა და დანიშნულებას განსაზღვრავს კომისია წარმოდგენილი განაცხადის მიხედვით, გუნდების/კლუბების საჭიროებებიდან გამომდინარე.

თ. წარმოდგენილი დოკუმენტაციის სოსწორესა და ნამდვილობაზე პასუხმგებელია დაფინანსების მიმღები სუბიექტი.

შენიშვნა#3: განაცხადის განხილვისას და დაფინანსების ოდენობის განსაზღვრისას, კომისია მხედველობაში მიიღებს დაფინანსების მამიებლის მიერ წარმოდგენილი დოკუმენტაციის შესაბამისობას ამ წესით დადგენილ მოთხოვნებთან, გუნდის საჭიროებებიდან და ქვეპროგრამის ფარგლებში გამოყოფილი თანხის ოდენობიდან გამომდინარე. იმ შემთხვევაში, თუკი დაფინანსებლის მამიებლების მიერ მოთხოვნილი თანხა საერთო ჯამში აჭარბებს ქვეპროგრამის ფარგლებში გამოყოფილი თანხის ოდენობას, კომისია უფლებამოსილია კენჭისყრით გადაანაწილოს თანხები (ასეთ შემთხვევაში, თანხის გადანაწილების პრინციპს ირჩევს კომისია და უყრის კენჭს).

მუხლი 4. კომისია

- ა. კომისია შედგება არაუმეტეს 9 (ცხრა) წევრისა, რომელსაც ნიშნავს სააგენტოს დირექტორი.
- ბ. კომისია საკუთარი შემადგენლობიდან ხმათა უმრავლესობით ირჩევს თავმჯდომარეს და მის მოადგილეს.
- გ. კომისია გადაწყვეტილება უნარიანია, თუ სხდომას ესწრება სრული შემადგენლობის ნახევარზე მეტი.
- დ. კომისია გადაწყვეტილებას იღებს დამსწრეთა სრული შემადგენლობის ხმათა უმრავლესობით (ხმების თანაბრად გაყოფის შემთხვევაში, გადამწყვეტად ითვლება სხდომის თავმჯდომარის გადაწყვეტილება).
- ე. კომისია უზრუნველყოფს კონკურსში მონაწილე კანდიდატთა მიერ წარმოდგენილი დოკუმენტაციის გადარჩევას და ადგენს, რამდენად სრულყოფილია წარმოდგენილი საბუთები.
- ვ. კომისიის წევრთა გადაწყვეტილებით, შესაძლებელია, კანდიდატს დამატებით ეთხოვოს საჭირო დოკუმენტის წარმოდგენა კომისიის მიერ დადგენილ ვადაში.
- ზ. კომისიის გადაწყვეტილებები აისახება სხდომის ოქმში, რომელსაც ხელს აწერენ კომისიის სხდომის თავმჯდომარე და კომისიის დამსწრე წევრები.
- თ. კომისიის სხდომების ორგანიზებასა და ოქმების შედგენას უზრუნველყოფს სხდომის მდივანი, რომელსაც ნიშნავს სააგენტოს დირექტორი.

მუხლი 5. დაფინანსების გაცემა

- ა. დაფინანსება განხორციელდება სააგენტოს დირექტორის ბრძანებით (ინდივიდუალური ადმინისტრაციულ სამართლებრივი აქტით) რომლის საფუძველს წარმოადგენს კომისიის მიერ მიღებული დადებითი გადაწყვეტილება (საოქმო გადაწყვეტილება).
- ბ. სააგენტოს უფლებამოსილია დაფინანსება გასცეს წელიწადში ორჯერ (აღნიშულთან დაკავშირებით დაფინანსების მიმღებთან ხელშეკრულება იდება ორჯერ).

მუხლი 6. ხელშეკრულების დადება

ა. სააგენტოსა და დაფინანსების მიმღებ სუბიექტს შორის ურთიერთობა წესრიგდება მხარეებს შორის გაფორმებული ხელშეკრულებით.

ბ. ხელშეკრულების ვადის პერიოდში დაფინანსების მიმღები სუბიექტი ვალდებულია იასპარეზოს აფხაზეთის (აფხაზეთთან დაკავშირებული) სახელით.

გ. ამ მუხლის „ბ“ პუნქტით გათვალისწინებული პირობების შეუსრულებლობის შემთხვევაში დაფინანსების მიმღები სუბიექტი ვალდებულია სააგენტოს დაუბრუნოს მიღებული თანხა სრულად.

შენიშვნა#4: ხელშეკრულების გაფორმებამდე წინაპირობას წარმოადგენს დაფინანსების მაძიებლის მხრიდან ცნობის წარმოდგენა შესაბამისი ბანკიდან იმის თაობაზე, რომ წარმოდგენილ საბანკო ანგარიშს არ ადევს ინკასო (ცნობა გაცემული უნდა იყოს წარმოდგენიდან ბოლო სამი სამუშაო დღის განმავლობაში).

მუხლი 7. თანხების ხარჯვის შესახებ ანგარიშის წარდგენა და კონტროლის განხორციელება

ამ წესის ფარგლებში მიღებული გადაწყვეტილებებისა და ხელშეკრულებით ნაკისრი ვალდებულებების შესრულების კონტროლს ახორციელებს სააგენტო წინასწარ განსაზღვრული მონიტორინგის მექანიზმებით:

ა. დაფინანსების მიმღები სუბიექტი ვალდებულია 2024 წლის 31 ოქტომბრის ჩათვლით წარმოადგინოს სააგენტოსგან მიღებული თანხის მიზნობრივად ხარჯვის თაობაზე შესაბამისი აუდიტორული დასკვნა, რომელიც გაცემული უნდა იყოს "ბუღალტრული აღრიცხვისა და ფინანსური ანგარიშგების აუდიტის შესახებ" კანონით განსაზღვრულ შემთხვევებში სერთიფიცირებული და ლიცენზირებული აუდიტორული ფირმის მიერ. აღნიშნული აუდიტორული მომსახურების ანაზღაურება დაფინანსების მიმღებ სუბიექტს შეუძლია დაფინანსების ფარგლებშიც შესაბამისი ინვოისის წარმოდგენის შემთხვევაში (აუდიტის დასკვნას თან უნდა ერთვოდეს ყველა ის საჭირო დოკუმენტაცია, რის საფუძველზედაც დაიწერა დასკვნა. სპორტული ინვენტარისა და ეკიპირების შეძენის შემთხვევაში აუცილებელია აუდიტორმა განახორციელოს ვიზიტი გუნდის/კლუბის იურიდიულ მისამართზე და დასკვნას დაურთოს შეძენილი ეკიპირებისა თუ ინვენტარის ფოტო მასალა).

ბ. ამ მუხლის „ა“ პუნქტით გათვალისწინებული პირობების ვადაგადაცილებით შესრულების შემთხვევაში დაფინანსების მიმღები სუბიექტი ვალდებულია სააგენტოს გადაუხადოს პირგასამტეხლო ამ ქვეპროგრამის ფარგლებში სააგენტოსგან მიღებული თანხის 0.05 პროცენტი ყოველ ვადაგადაცილებულ დღეზე.

გ. ამ მუხლის „ა“ პუნქტით გათვალისწინებული პირობების შეუსრულებლობის შემთხვევაში სააგენტო უფლებამოსილია ცალმხრივად შეწყვიტოს ხელშეკრულება, ხოლო დაფინანსების მიმღები სუბიექტი ვალდებულია სააგენტოს დაუბრუნოს მიღებული თანხა სრულად,

ამასთანავე სუბიექტი კარგავს სააგენტოსგან ნებისმიერი დაფინანსების მიღების შესაძლებლობას.

დ. იმ შემთხვევაში, თუკი დაფინანსების მიმღებმა სუბიექტმა მიღებული თანხა სრულად ვერ აითვისა, აუთვისებელი თანხა უნდა დააბრუნოს სააგენტოს მიერ მითითებულ სახაზინო ანგარიშზე.

მუხლი 8. დაფინანსების ადმინისტრირება

ა. სააგენტო უფლებამოსილია დაფინანსება გასცეს წელიწადში ერთხელ ან ორჯერ (გრაფიკი გაწერილი უნდა იყოს ხელშეკრულებით). კომისია იკრიბება წელიწადში ერთხელ და განსაზღვრავს დაფინანსების მიმღები სუბიექტისთვის გასაცემი თანხის ოდენობას და გაცემის წესს, ამასთანავე, კომისიის თავმჯდომარის ან/და კომისიის წევრთა ნახევარზე მეტის მოთხოვნის საფუძველზე შესაძლებელია კომისია შეიკრიბოს რამდენჯერმე (საჭიროებიდან გამომდინარე საკითხის ობიექტურად, კანონიერად და სამართლებრივად გადაწყვეტის მიზნით).

ბ. დაფინანსების მიმღები სუბიექტი ვალდებულია განახორციელოს თანხის მიზნობრივად ხარჯვა მხარეებს შორის გაფორმებული ხელშეკრულების შესაბამისად.

მუხლი 9. ანგარიშსწორება

ა. დაფინანსების მიმღებ სუბიექტს თანხა გადაერიცხება ეროვნულ ვალუტაში, ლარში.

ბ. დაფინანსების მიმღები სუბიექტის მიერ წარმოდგენილ ხარჯთაღრიცხვაში (მთლიანად ან ცალკეულ პუნქტებში) უცხოური ვალუტის (ლართან მიმართებით) სავარაუდო გაცვლითი კურსის მითითების შემთხვევაში, აღნიშნულის გათვალისწინებით, სააგენტოს მხრიდან დაფინანსების მიმღებ სუბიექტს შესაბამის ანგარიშზე ჩაერიცხება მის მიერ მოთხოვნილი საერთო თანხა ლარში (იმ დროისათვის ეროვნული ბანკის მიერ არსებული გაცვლითი კურსის შესაბამისად).